

Komunikadu Imprensa Tribunál Distritál Oe-cusse 24 Novembru 2015

JSMP Lansa Relatóriu kona-ba Aplikasaun Sentesa Alternativa iha Kazu Violénsia Doméstika iha Tribunál Distritál Oe-cusse Parte ida husi USAID nia Projetu Ba Distrito

Judicial System Monitoring Programme (JSMP) nia monitorizasaun, ne'ebe parte ida husi USAID nia projetu Ba Distrito, hatudu katak kazu violénsia doméstika kontinua reprezenta kazu singulár ho númeru ne'ebe aas iha Tribunál Oe-cusse, tuir relatóriu tématiku foun ne'ebé lansá ohin iha Salaun Administrasaun Munisípal Oe-cusse.

Relatóriu tématiku ho títulu *Aplikasaun Sentesa Alternativa iha Kazu Violénsia Doméstika iha Tribunál Distritál Oe-cusse*, deskobre katak JSMP monitoriza kazu violénsia doméstika hamutuk 151 iha Tribunál Distritál Oe-cusse, husi total kazu 257 ne'ebé JSMP konsege monitoriza durante fulan 19 nia laran, hahu husi Marsu 2014 – Setembru 2015.

JSMP ninia monitorizasaun no relatóriu tématiku ida ne'e realiza liuhusi USAID nia projetu Ba Distrito ne'ebe ho apoiu jenerozu husi povu Amerikanu liuhusi Ajénsia Estadus Unidus ba Dezenvolvimentu Internasionál (USAID).

Relatóriu ida ne'e foka ba estatístiku husi Tribunál Distritál Oe-cusse hanesan estudu kazu hodi subliña moda ka tendénsia iha sentensa iha kazu violénsia doméstika durante períodu monitorizasaun ne'ebé refere.

“Tendénsia kona-ba sentensa ne'ebé diskuti iha relatóriu ne'e fornese referensia útil ba tribunál kona-ba difikuldade oinsa determina sentensa ne'ebé apropiadu iha kazu violénsia doméstika. Mesmu nune'e, tribunál sira presiza haree ba sirkunstánsia hotu, inklui prinsípiu sentensa, rekerimentu spesífiku ba kada tipu sentensa, no fatór úniku iha kazu ida-idak atu asegura objetivu prevensaun ba violénsia no garantia vítima nia seguransa,” hateten Diretor Ezekutívu JSMP, Señor Luis Oliveira Sampaio.

Husi total kazu violénsia doméstika ne'ebé JSMP monitoriza iha Tribunál Distritál Oe-cusse, só porsentu sia (9%) deit mak envolve arguida feto. Relasiona ho sentensa, porsentu 53 (53%) husi total kazu violénsia doméstika ne'ebé JSMP monitoriza iha Tribunál Distritál Oe-cusse hetan suspensaun ba pena prizaun, no porsentu 36 (36%) husi total kazu hetan pena multa.

Wainhira krime violénsia doméstika to'o ba tribunál, tribunál la bele halo mediasaun ka homologa. Estatístiku hanesan ne'e mós hatudu katak promulgasaun LKVD la natoon hodi hapara violénsia doméstika. Violénsia doméstika sei kontinua akontese beibeik se karik la iha esforsu koordinadu husi atór hotu-hotu, inklui tribunál no prokuradór sira.

Relatóriu ida-ne'e fornese hanoin katak Tribunál no juis sira iha papél importante ba kontekstu ida ne'e, tanba sira hetan kargu hodi foti desizaun iha kazu violénsia doméstika tuir prinsípiu sira ne'ebé defini ona iha Kódigu Penál (Dekretu Lei Nú. 19/2009).

“Servisu monitorizasaun ne’ebe halo ona husi JSMP ne’e fó hanoin ne’ebe importante kona-ba oinsa tribunál sira rezolve kazu violensia doméstika sira. Informasaun sira ne’e valór tebes ou importante tebes la’os deit ba autór tribunál sira, maibe mós governu, organizasaun sosiedade sivil sira, no organizasaun sira seluk ne’ebe bele uja informasaun sira iha relatóriu ne’e hodi determina oinsa servísu hamutuk hodi aseguara justísa ba vitíma no arguidu sira. Fahe informasaun kona-ba rezultadu husi kazu sira iha tribunal sei hametin komunidadade nia fiar ba abilidade sistéma justisa formál hodi responde ba violensia domestika,” hateten Xefe Ekipa husi Ba Distrito, Señora Carolyn Tanner, husi ONG Counterpart International.

Analizasaun iha relatóriu ida ne’e hanesan kontinuasaun husi analizasaun ne’ebe JSMP halo ona kona-ba akuzasaun, sentensa no ezekusaun sentensa iha kazu violénsia doméstika liuhusi JSMP nia relatóriu temátiku: *‘Lei Kontra Violénsia Doméstika (LKVD): Tinan tolu iha implementasaun ho nia obstaklu’*.

Atu hetan informasaun kompletu, favor kontaktu:

Sr. Luis de Oliveira Sampaio
Diretór Ezekutivu, JSMP
Email: luis@jsmp.minihub.org

Governu Amerikanu, liu hosi **USAID**, servisu hamutuk ho governu Timor-Leste hodi suporta dezentvolvimentu ne’ebé efektivu iha setór oioin. Dezde tinan 2001, USAID ajuda ona fundus kuaze millaun 308 dolares amerikanu hodi suporta dezentvolvimentu iha Timor-Leste, no iha tinan 2013, USAID fornese millaun 12 dolares amerikanu hodi hadi’a povu-nia moris Timor-Leste. USAID apoia Timor-Leste-nia esforsu atu harii nasaun demokrátiku ida ne’ebé prosperu no saudavel liu hosi programa sira ne’ebé promove kreximentu ekonómiku ho sustentável no inklusivu, liuliu iha setór agrikultura; hadi’a saúde povu Timor-Leste, liuliu ba labarik no feto sira; no hametin fundasaun ba governasaun di’ak—hirak ne’e mak área importante sira ne’ebé mensiona iha Timor-Leste-nia Planu Estratéjiku ba tinan 2013-2030.

Counterpart Internasional maka organizasaun dezentvolvimentu global ne’ebé haforsa ema no komunidadade atu implementa solusaun ne’ebé inovativu no di’ak ba dezafiu sosial, ekonomia no ambiente. Tinan 50 ona, Counterpart halo parseiru ho komunidadade hodi rezolve nesetidade ba problema ne’ebé kompleksu relasiona ho dezentvolvimentu ekonomiku, seguransa ai han no nutrisaun, no harii governasaun no instituisaun ne’ebé efektivu. Ho prezensa Counterpart iha nasaun hamutuk 25, lora-lora Counterpart serbisu hamutuk ho ema iha mundu tomak atu estabese solusaun ne’ebé sustentavel atu fahe dezafiu ne’ebé iha. Ba informasaun liu tan vizita ami nia website: www.counterpart.org.

JSMP estabese iha 28 Abril 2001 ho objetivu atu halo monitorizasaun kona-ba prosesu julgamentu iha Tribunál Ad Hoc Indonézia nian relasiona ho violasaun direitu umanu no Painél Espesiál ba Krime Grave iha Timór Leste. Agora JSMP maka ONG prinsipál iha Timor-Leste ne’ebé monitoriza sistema justisa no halo advokasia ba legalidade, transparénsia, akuntabilidade no haforte estadu de dereitu. Ho nia vizaun mak sosiadade demokrátiku ne’ebe garantia justisa no direitus umanus ba ema hotu, no ninia misaun mak atu servisu ho espiritu kolaborativu hodi promove no proteje demokrasia, lei, justisa no direitu umanu liu husi:

- Monitorizasaun
- Edukasaun legál no
- Advokasia